

[Augsburg], 1. Juli 1567

An Johannes Oporinus

UB Basel, Fr. Gr. I 11, fol. 296r.
Steinmann Nr. 785.

S. Nihil est quod scribam, nisi de nugis meis: quas tibi aequè, ac potius maiori curae esse scio, quam mihi. Habes me, Mi D. Oporine, ἀδρηστότατον ἀνδράποδον. In ergastulo tuo moriendum mihi esse video. In Demosthene et Vlpiano hactenus laborau, nec vltra 3. Olynthiacas corrigendo, annotando καὶ τῷ γνωμολογεῖν, per occupationes solito plures, progredi licuit. Quare commentarios Officiorum recognoscendos sumpsi, quos, vt aut in Nondinis, aut ex ijs domum reuersus, certò (quantum quidem in me erit) accipias, curabo. Reliqui libelli tempestinè sequentur, vt, si volueris, ad nondinas vernas absolui abs te possint. Ego meas annotationes peculiari tomo seorsim excudi velim. Iustum enim volumen conficient, vt et caeterorum commentarij, Venetijs anno 63. recusi, ijs exceptis, qui abs te olim editi sunt, omnino addendis. Tractant enim et grammatica et historica, et similia loca conferunt, et alia quaedam inserunt, quae ego non nisi parcè et obiter attigi, ne actum agam. Quòd si hos commentariolos hoc anno absoluere visum tibi fuerit: operam equidem dabo, vt primum et secundum Aeschinis et Demosthenis graecolatini tomum nondinis vernis tibi mittam. ἀλλὰ ταῦτα μὲν θεῶν ἐπὶ γούνασι κεῖται. Fortassis enim interea moriar. Sed quicquid mihi acciderit, Mi D. Oporine, habes tecum inuenem excellentissimum, πλείστων ἀντάξιον ἄλλων, qui non modò, quod à me praetermissum peccatumé fuerit, supplere et corrigere, sed etiam noua omnia meliora facere poterit. Ei ego potestatem facio vnà tecum quiduis de meis nugis statuendi: quem ea ingenij praestantia cognoui, vt possit, eo esse candore spero, vt velit ea praestare, quae mihi non tam Natura quam fortuna denegauit. Labor! non parco, sed dies noctesqüe sum occupatus. Sed ante annos 20, cum tu me scriptorem fecisti, vno die plura potui absoluere, quam nunc toto ferè mense: Totum interiectum tempus scribendis indicibus, et vertendis recentiorum nugis, et prioribus lucubrationibus meis recudendis est tributum: Legendi ocium non fuit. Interim ea quae olim legeram, exciderunt, aut ita haerent adhuc, vt in autorum et nominibus et locis saepè errem: multa etiam dictu opportuna prorsus ne in mentem quidem mihi veniant. Tu igitur, Mi D. Oporine, Canterum Wolfio substitutes, Lunae occiduae Solem illustrissimè orientem: cui ego tantum tribuo, vt aequiore animo quoquis tempore sim moritus, eo relicto successore, vt antecessorem nemo sit desideraturus. Vale, et D. Carino¹ P[lerimam] S[alutem] à quo responsum expecto, cum ter ad eum à Nondinis scripserim. D. item Zwingero nostro. Cal[endas] Iulij 1567.

Hiero[nymus] Wolfius
Tuus.

¹Vermerk von der Hand von Oporinus am Rand: Salutat te etiam Oporinus, mi D. Carine.